

(四縣腔) 編號 01 號

【阿姆个鹹糜】黃旭霞原作

起屋个師傅還過做小工个叔姆在禾埕頂無閒泊杈。師傅交代叔姆愛膠磚仔淋濕來起屋時正好用，阿姆看叔姆無閒在該攪沙仔，走去牽水管仔來淋磚仔，佢就跔等阿姆在旁脣搞水。

阿爸在外地上班無法度輒輒轉屋下，屋下大細頂个事情全部係阿姆一儕人揸起來做到兩頭烏，佢俚毋知頭天个三姊妹，想著會有新屋好歇、有自家个間房好戴，心肝肚不時都固有歡喜个心情。成時阿姆喊來揸手搬磚仔、疊磚仔、攞水、攞茶……，佢膠兩個阿哥定著會去揸手！

下晝兩點空仔，阿姆在灶下無閒，耳公聽著阿姆拿菜刀切豬肉、香菇、芹菜，洗鑊頭、開瓦斯……，哇！阿姆愛開始煮點心哩！佢恬恬仔去灶下看阿姆煮點心。阿姆對豬油盞仔挖兜仔豬油放落鑊肚，續等放浸過个蝦米、香菇來鼓香，炒出香味過後放切好个竹筍，炒一下仔，正放洗淨个米共下過炒，浸過蝦米同香菇个水也無打爽，滴兜仔豆油後就同滾水共下倒落去煲糜哩！差毋多半點零鐘邊仔糜就煲好咗，毋過糜燒爐仔，阿姆就同歸鑊

仔个糜沾<sup>1</sup>在大面盆裡肚，分糜莫恁燒。

「阿霞！揸手撿碗筷，放到禾埕个矮桌仔頂。」

聽著阿姆喊，佢遽遽排好碗筷，阿姆就喊佢三姊妹入去旁脣个矮屋肚搞。阿姆講：「師傅食點心，細人仔毋好坐在脣頭看人食，恁樣無禮貌。」行入矮屋肚佢就拿細凳頭仔來墊腳，對細窗門仔偷看師傅佢兜食點心，老師傅添第三碗，做小工个叔姆也添第二碗，佢心肝肚當緊張，肚屎咕嚕咕嚕个聲也毋會輸人。阿姆煲到恁大鑊个鹹糜就會無咧！吾个嘴，毋知幾時嘎翹到半天高。

佢遽遽走去灶下，該央時阿姆去收該伸無兩碗个鹹糜咗，阿姆喊佢去揸手收碗筷，佢毋甘願，慢慢仔行、慢慢仔做，碗筷放在灶下就愛走咧！阿姆講：「去拿碗來裝。」原來，阿姆煲好鹹糜，早就有留兜仔分三個細人仔咗。

佢遽遽拿碗去裝糜，這下就顧毋得該下發關个面子咧！鼻公膠嘴愛開始無閒哩啲！

一碗好食个鹹糜，有香菇、蝦米、竹筍、靚豬肉、芹菜，還過阿姆惜子女个心。還細時節佢食毋多出來，這下佢自家做阿姆咧，特別感受得著這一碗鹹糜个好味緒！

<sup>1</sup> 沾：音 dem ㄟ；把物品微微浸泡於水面。

(四縣腔) 編號 02 號

【賣菜】謝惠如原作

記得讀三年生該下，屋下人多食用乜多，阿姆除忒做田事還愛打理屋下人个三餐，故所利用屋側角該空地來種菜，種啊種欸，菜嘎多到食毋去，將就載去街項賣。

九冬十月禾仔割忒後，一個奈日阿姆愛偃跔佢去搵賣菜，去到菜市場个路脣，阿姆頓好自行車，同後斗疊到尖起來个角菜，下十過抓<sup>1</sup>下來喊偃在該掌等賣，無講橫無講直佢自家又隨載去街項等來賣也，攞偃一儕人在該呆呆，毋知愛仰結煞正好。

偃本成就面皮薄，見看著毋識个人就會面紅濟炸，莫講愛喊人買菜，無結無煞个偃，敗勢到頭犁犁仔，全毋敢臥起頭來看人，好得隔壁賣番薯个老伯姆看偃恁恬又畏羞，笑笑仔講：「細阿妹仔，毋使驚，你做你大聲喊賣菜，人家聽著就會撇轉來看你賣麼个，無定著有佢想愛買个菜，鴨嫲嘴乜罔吮正有好食，來！偃喊分你聽：『來唷！來買番薯唷！好食个番薯，粉又甜哦！包你食也還會倒轉來買唷！』」聽著老伯姆个喝賣後，偃就膽膽仔試喊啊：「來唷！來買菜哦！一抓十個銀定定。」正喊啊煞，一

<sup>1</sup> 下十過抓：音 ha\ siib go za\；解下十多把。

個阿姨人聽著隨停下來買，還說偃恁乖恁曉得。聽著佢个阿謔，偃暢到緊喊緊大聲，行過吾面前个人，十個有八個大體會停下來同偃買菜，無幾久就賣忒也，分偃試著賣菜一息仔都毋會難。

冬下頭日仔短，臨暗仔放學轉到屋下，鞋一脫衫一換，跔等就走去菜園同阿姆搵摘菜。暗晡頭食飽夜後，同阿哥兩儕開始擇菜、秤菜，偃兜負責个事頭，除忒愛同一頭一頭仔有黃葉還過燥葉个菜蓋仔<sup>2</sup>擘忒以外，還愛摻有泥个菜搵淨來，整理好勢也，正一抓一抓仔秤畀平重綳起來。阿姆不時吩咐偃兜：「有東西好賣，斤兩定著愛罇，雖然正十銀八角又乜係錢，秤頭就係路頭，毋好去梟批人。還有賣食个東西，自家愛敢食个正好拿去賣人。」這兜話偃全記在心。

賣菜雖然係一種小生理賺無麼个錢，也無麼个大學問，毋過對這擇菜、賣菜个過程裡肚，分偃學著盡多做人做事个道理。

<sup>2</sup> 菜蓋仔：音 coi hab\ e\；指所有蔬菜外層較老較黃的葉子。